



4. ՊՈԼՍԻ ՀԱՅՈՑ ՊԱՏՐԻԱՐԷԻ ԺԱՄԱՆՈՒՄԸ ՄԱՅՐ ԱԹՈՒ Ս. ԷԶՄԻԱԾԻՆ

Սեպտեմբերի 13-ին, ուրբաթ օրը, Մայր Աթոռ Ս. Էջմիածին է ժամանում Թուրքիայի հայոց Ամենապատիվ Ս. Շնորհք արքեպ. Գալուստյանը:

Նույն օրը պատրիարք հոր հետ Մայր Աթոռ է ժամանում գերաշնորհ Ս. Տիրան արքեպ. Ներսիսյանը:

Պատրիարք սրբազան հորը և Ս. Տիրան սրբազանին Երևանի «Զվարթնոց» օդանավակայանում դիմավորում է Մայր Աթոռի միաբանությունը՝ գլխավորությամբ Ս. Ներսես եպս. Պոպապայանի:

Մայր տաճարի շքամուտքի առաջ, Մայր Աթոռի լուսարարապետ Ս. Հուսիկ արքեպ. Սանթրոյանի գլխավորությամբ, եկեղեցական թափօրը «Հրաշափառ» շարական-երգով Ամենապատիվ սրբազան հորն առաջնորդում է Մայր տաճար, ուր Իջման Ս. Սեդանի առաջ Ս. Հուսիկ արքեպիսկոպոսը ողջունում է մեծապատիվ հյուրերին հետևյալ խոսքերով.

«Թույլ տվեք այս ուրախ պահին, հանուն Վեհափառ Հայրապետի, Մայր Աթոռիս միաբանության, ուսանողության և ներկա հավատացյալների, սրտագինս ողջունել Ձեզ, սրբազան պատրիարք և գերաշնորհ Ս. Տիրան արքեպ. Ներսիսյան, և բարի գալուստ մաղթել ի Ս. Էջմիածին:

Սրբազան պատրիարք, շատ անգամներ եք Դուք եկել Մայր Աթոռ Ս. Էջմիածին ու ամեն անգամ Ձեր բարի գալուստը ուրախություն և ոգևորություն եք պարգևել մեզ բոլորիս: Դուք այժմ գտնվում եք այն եկեղեցում, որն ամենից նվիրականն է և մայրը Հայաստանյայց բոլոր եկեղեցիների, քանի որ այստեղ իջավ Միածինը և հաստատեց այս եկեղեցին Ս. Գրիգոր Լուսավորչի ձեռքով:

Ես սրտանց մաղթում եմ, որ Աստված Ձեր այս բարի այցը օրհնությամբ պսակի: Ձեզ ցանկանում եմ քաջառողջություն և արևշատություն, որպեսզի Ձեր ողջ ժողովուրդը միջոտ հոգևոր մխիթարություն ստանա Ձեր Ամենապատվությունից»:

Այնուհետև պատասխան շնորհակալական խոսք է ասում Ամեն. Ս. Շնորհք արքեպ. Գալուստյանը. «Ինծի համար մեծ երջանկություն է անգամ մը ևս գտնվիլ այս նվիրական, սրբազան հարկի ներքև: Ինծի համար նաև մեծ երջանկություն է, որ կաշխատինք Ս. Գրիգոր Լուսավորչի և Ս. Մեսրոպի ջահը վառ պահել մեր հավատացյալներու հոգիներուն մեջ: Մեր ժողովուրդը ոչ միայն հավատարիմ քաղաքացին է իր երկրին և իր քաղաքացիական պարտականությունները լիովին կկատարե այնտեղ, այլ նաև հոգևոր ձևով սրտանց կապված է այս վերին և գերազույն կեդրոնին, ուրկե քրիստոնեական հավատքը ծագեցավ Հայաստան աշխարհին: Հետևաբար ես կբերեմ ձեր եղբայրներուն և կրոնակիցներուն ու ամենքիդ սիրալի ողջուններ:

Այս սրբատաշ քարերեն ուղղակի կորություն կներարկվի մեր բնության մեջ, և մենք երջանկությամբ ու նվիրումով կհամբուրենք այս սրբատաշ քարերը և այս Սուրբ Խաչը: Այո՛, մենք այս հարկի տակ իրապես կզգանք մշտնջենական ներկայությունը աստվածային Աջին»:

Պատրիարք սրբազանը հոգեկան գոհունակությամբ է նշում, որ այս ուրախ առիթով իր հետ Մայր Աթոռ Ս. Էջմիածին է այցելել Ս. Տիրան արքեպ. Ներսիսյանը:

Իր խոսքի վերջում Ամենապատիվ Ս. Շնորհք արքեպիսկոպոսը մաղթում է, որ Աստուծո պահպանիչ Աջը միշտ անսասան պահի Հայ Առաքելական եկեղեցին և Մայր Աթոռ Ս. Էջմիածինը: Այնուհետև իր մաղթանքն է հղում Հայոց Հայրապետին՝ ցանկանալով Նրան հաջողություններ, արևշատություն, որպեսզի նա իմաստությամբ առաջնորդի Հայաստանյայց եկեղեցին:

Ապա պատրիարք սրբազան հայրը հանդիսավոր թափօրով առաջնորդվում է Վեհարան: Վեհարանի մուտքի մոտ Վեհափառ Հայրապետը ընդունում է նրան եղբայրական ջերմ սիրով ու ողջագուրումով: